

Inilalathala ng Partido Komunista ng Pilipinas-Bagong Hukbong Bayan sa Rehiyong Bicol

REBOLUSYONARYONG
PANGMASANG
PAHAYAGAN
NG BIKOL

Espesyal na Isyu
Oktubre 2004

Walang Kasintinding Krisis: Hudyat ng Pagbagsak ni Gloria

Bigwas ng latigong pasakit sa mamamayan ang walang kasintinding krisis sa bansa. Treseng ulit nang itinaas ng pandaigdigang monopolyo ang presyo ng langis at iba pang produktong petrolyo bunga ng pananakop ng US sa Iraq. Kasabay nito, ang winaldas na kabang yaman noong nakaraang eleksyon at ang walang ampat na korapsyon sa gubyrerno ay nagresulta sa patuloy na pagtaas ng presyo ng mga bilihin, pamasaha, tubig, kuryente at iba pang serbisyo. Kaya lalong tumindi ang paghihikahos ng mamamayan.



Inilalathala ng Partido Komunista ng Pilipinas-Bagong Hukbong Bayan sa Rehiyong Bicol

Walang Kasintinding Krisis: Hudyat ng Pagbagsak ni Gloria

Hindi na maabot ang presyo ng mga batayang pangangailangan habang wala namang pagtaas sa kita ng mamamayan. Barat ang presyo ng kopras, mais, palay at mga lokal na produktong agrikultural. Nakapako sa P60-120 ang arawang kita ng mga manggagawang bukid at mala-manggagawa. Bingi naman ang mga kapitalista sa kahilingan ng mga manggagawa para sa P125 dagdag na sahod. Maging ang mga guro at kawani sa guberno ay dumaraing para sa dagdag na P3,000 sa sweldo.

Mas masahol ang kalagayan ng kawalang hanapbuhay at kawalang kasiguruhan sa trabaho. Habang dumaraing ang *libu-libong manggagawang kontraktwal* at kaswal na empleyado, daan libo pang kawani sa guberno ang nahaharap sa malawakang tanggalang dulot ng *streamlining* sa guberno.

Kalapastangan ang panawagan ni Macapagal-Arroyo na magtipid ang nagdarahop na mamamayan. Mga sikmurang kumakalam sa gutom ang hihigpitan ng sinturon! Samantalang garapalang nagpapasasa sa kabundatan sa nakaw na yaman ang matataas na heneral sa AFP, mga upisyal sa Philippine Charity Sweepstakes Office, National Power Corporation, Government Service Insurance System at mismong si Macapagal-Arroyo. Talamak ang korapsyon sa buong bukrasya, maging ang pag-imprenta ng mga libro sa Department of Education ay hindi pinaliligtas ng mga sindikato sa guberno.

Sadyang pinatatampok ng rehimeng Macapagal-Arroyo ang isyu ng pagsambulat sa susunod na taon ng fiscal crisis upang pagtakpan at ilihis ang usapin sa matinding pangkalahataang krisis na kinalulugmukan ng bansa.

Ikinukundisyon na ang isipan ng mamamayan para tanggapin ang dagdag

na pahirap na walong programa sa buwis. Madagdagan man ang koleksyon ng buwis, hindi sasapat ang pondo para sa isang gubernong lubog sa kumunoy ng utang at talamak ang walang kahihiyang katiwalian at korapsyon.



Palagiang umiiral ang krisis pampinansya sa isang gubernong nakaasa lamang sa pangungutang sa mga imperyalistang bangko at *institution* ng pampinansya upang tustusan ang taunang

badyet na mas malaki kaysa kinikita. Kaya hindi rin nakapagtataka kung bakit nagkukumahog si Macapagal-Arroyo sa pagtitiyak na maglaan sa mga susunod na taon ng pondong pambayad sa maaanomalyang utang panlabas na hindi naman pinakinabangan ng mamamayan.

Patuloy namang tinatapyasan ang badyet na nakalaan para sa kalusugan, edukasyon at iba pang pampublikong serbisyo. Malinaw na sa harap ng labis na kakulangan sa pananalapi ng guberno, ang mamamayan ang pangunahing nagdurusa.

sundan sa pahina 3

Walang Kasintinding Krisis: Hudyat ng Pagbagsak ni Gloria

Ang krisis pampinansya ay bahagi ng pamalagiang krisis ng lipunang malakolonyal at malapyudal.

Pinanatiling atrasado ang agrikultura at di industriyalisado ang ekonomyang nasa kontrol at dominasyon ng dayuhang monopolyo kapitalista at lokal na parasitikong panginoong maylupa.

Bumubuhos sa lansangan ang papalaking protesta ng mamamayan.

Umaalingawngaw sa buong bansa ang sigaw na patalsikin si Gloria Macapagal-Arroyo.

Labis ang pagkadismaya ng mamamayan sa kainutilan ng kasalukuyang rehimen. Taglay nito ang kumpyansang mapapatalsik sa pamamagitan ng pag-aalsang masa ang rehimen ng US-Macapagal-Arroyo, katulad nina Marcos noong 1986 at Estrada noong 2001.

Maaaring magtulungan ang lahat ng makabayan at progresibong pwersa upang ipalit ang isang gubyrno na nagkakaisang prente na tunay na kinatawan ng mga manggagawa, magsasaka, panggitnang pwersa, at maging mga burukratang sibil



at karaniwang militar na bumabatikos at iwinawaksi ang korapsyon at pagkapapet sa US ng naghaharing rehimen.

Paparaming pulang mandirigma ang sumasampa sa NPA. Yinayanig ang rehimen ng maigting na mga taktikal na opensiba. At libu-libong mamamayan ang pumapanig sa armadong rebolusyon pagkat namumulat sila na tanging sa pamamagitan ng pagsusulong ng rebolusyonaryong pagbabago makakamit ang permanteng solusyon sa palagiang krisis na kinalulugmukan ng sambayanang Pilipino!

S

BALITA SILYABALITA SILYABALITA SILYABALITA SILYABALITA

Kilos Protesta at Tigil Pasada sa Bikol, Matagumpay

"Ipinakita ng matagumpay na tigil-pasada ng mga drayber at opereytor sa buong Bikol at malakas na suporta ng mamamayan, ang nagngangalit na damdamin ng mamamayan laban sa tila walang katapusang pahirap ng naghaharing rehimen ng Macapagal-Arroyo at ng mga dayuhang negosyo sa bansa," ang pahayag ni Ka Greg Bañares, ang tagapagsalita ng NDF-Bicol.

Nitong Oktubre 25, nagkaisa ang mamamayang Bikolano sa paglaban sa walang tigil na pagtaas ng presyo ng langis. Itinuloy ang tigil pasada sa rehiyon sa kabila ng

pagkaantala sa pagkasa ng tigil pasada ng ilang grupo sa transport sektor sa Kamaynilaan.

Sa prubinsya ng Camarines Norte, halos 100 porsyento ang paglahok sa tigil pasada ng bus, van at dyipning bumibyahe sa prubinsya at 98 porsyento ng mga traysikel.

Nagrehistro din ng 99 porsyentong paralisasyon sa transportasyon ang dalawang araw na tigil pasada sa prubinsya ng Albay at Sorsogon. Lumahok din sa tigil-pasada ang mga drayber ng bus na bumibyahe sa Partido erya ng Camarines Sur at mga pampasaherong van patungong Daet at Legaspi City.

Ang nakaraang tigil pasada ay umani ng malawak na simpatya ng mamamayan at lubos na sinuportahan ng midya.

S

Krisis Pampinansya ng Guberno: Sintomas ng Naghihingalong Ekonomya

Pinatatampok ng rehimeng US-Macapagal-Arroyo ang isyu ng pagsambulat diumano ng fiscal crisis sa susunod na taon ngunit ikinukubli nito ang mas malalang krisis sa ekonomya ng bansa.

Ang paglala ng fiscal krisis o krisis pampinansya ng guberno ay bunsod ng pagliit ng kita at lalong paglobo ng utang nito. At ang lumalaking pangungutang nito ay sa pagbabayad utang din napupunta. Ang palyado at bangkrap na guberno ay pinapaandar na lamang sa pamamagitan ng tuluy-tuloy na pangungutang kaya lalo itong nababaon sa utang.

Labis ang kakulangang pampinansya ng guberno, hindi na nito kayang tustusan ang taunang badyet na mas malaki kaysa sa kinikita. Umabot na sa halos P200 bilyon ang depisit sa badyet ng guberno, at tinatayang aabot ito sa P400 bilyon sa pagtatapos ng taon.

Sa nakaraang taon, umabot sa P400 bilyon ang nawala sa kita ng guberno dahil sa liberalisasyon. Binawasan ang taripa sa pagpasok ng mga imported na produkto at halos ilibre ang buwis ng mga dayuhang mamumuhunan sa bansa. Ang malawakang liberalisasyon sa kalakalan at pamumuhunan ay lalong nagpabagsak sa lokal na negosyo.

Taun-taon, lumiliit din ang kita mula sa koleksyon ng buwis dahil sa malawakang *tax evasion* ng malalaking burgesya kumprador. At halos naubos nang naibenta ang mga ari-arian ng guberno dahil sa malawakang pribatisasyon sa panahon ng panunungkulan nina Aquino at Ramos.

Walang ampat ang papalaking pangungutang ng guberno sa mga dayuhan

at lokal na bangko para punuan ang kakulangan sa badyet at bayaran ang dambuhalang utang na hindi naman pinakinabangan ng mamamayan.

Umabot na sa P3.3 trilyon (60 bilyong dolyar) ang utang panlabas ng bansa at ang P6 trilyon ang utang sa lokal na bangko at institusyong pampinansya. Sa ilang taon lamang na panunungkulan ni Macapagal-

Arroyo, nadagdagan ng \$6.3 bilyon at P765 bilyon ang dayuhan at lokal na utang. Nahigitan na niya ang rekord ng lahat ng naunang presidente.

Sinalo din ng guberno ang P500 bilyong utang ng Napocor para padulasin diumano ang ganap nitong pribatisasyon tungo sa dayuhang kapitalista. Dahil dito, madadagdagan ng P35 bilyon ang taunang depisit sa badyet sa susunod na

limang taon.

Nitong 2005, tiniyak ni Macapagal-Arroyo ang paglalaan ng P700 bilyon o 70 porsyento ng badyet ng guberno para sa pagbabayad ng utang. Ang P300 bilyon nito ay pambayad sa interes pa lamang. Awtomatikong kinakaltas ang 40 hanggang 50 porsyento ng taunang badyet ng guberno para sa pagbabayad ng utang dahil sa Presidential Decree 1177 ni Marcos.

Sa gitna ng labis na kakapusan sa badyet, walang pakundangan ang pangungutang ng guberno sa mga imperyalistang institusyong pampinansya, pangunahin sa IMF at World Bank na tahasang nagdidikta ng malulupit na mga patakarang pang-ekonomya. Kaya lubusan nang ibinukas sa patakarang liberalisasyon, pribatisasyon at deregulasyon ang ekonomya ng bansa.

sundan sa pahina 5



Pandaigdigang Araw ng Kawalan ng Pagkain


"Dapat pagbayarin ang rehimeng US-Macapagal-Arroyo sa nararanasang malubhang pagkagutom ng mamamayang Pilipino," ang pahayag ni Ka Greg Bañares, ang tagapagsalita ng NDF-Bicol sa paggunita ng Pandaigdigang Araw ng Kawalan ng Pagkain nitong Oktubre 21.

Tinuligsa ni Ka Greg ang lubusang pagkapapet ng rehimeng Macapagal-Arroyo sa imperyalistang dikta ng US. Aniya, globalisasyon ang nasa likod ng malubhang kagutuman at pagkabusabos ng mga magsasaka, manggagawa at maralitang mamamayan sa kanayunan at mga syudad.

Habang laganap ang kagutumang nararanasan ng mamamayan, nagpapasasa naman sa kurakot si Macapagal-Arroyo at ang kanyang mga alipures. Mahigit P200 bilyon pondo ng gubyerno ang nawawaldas sa korapsyon taun-taon.

Nanawagan si Ka Greg para sa pagpapataksik sa sagadsaring papet at kontra-mamamayang rehimeng US-Macapagal-Arroyo sa pamamagitan ng malalaking kilos-protesta ng mamamayan.

Kasabay nito ang paglulunsad ng NPA ng mga taktikal na opensiba sa kanayunan. **S**



Krisis Pampinansya ng Gubyerno

Inalis na ang lahat ng proteksyon sa ekonomya ng bansa at permanenteng nakakabit ang swero ng dayuhang pautang.

Ang krisis pampinansya ay bahagi ng permanenteng krisis ng malakolonyal at malapyudal na lipunan. Umiiral na ito mula sa rehimeng Diosdado Macapagal hanggang sa kasalukuyan. Simula naman noong 1981, nararanasan ang papalalang krisis pampinansya ng reaksyunaryong gubyerno. Ang malaking kinita sa loob ng maikling panahong panunungkulan ni Ramos ay mula sa pagbebenta ng mga ari-arian ng gubyerno. Subalit sa mga sumunod na taon, lalupang tumindi ang kakulangan sa kita ng gubyerno nang mahagupit din ito ng pampinansyang krisis sa Asya at pandaigdigang krisis sa labis na produksyon.

Sa tindi ng krisis pampinansya ng gubyerno, lalupang binabawasan ang kakarampot na ngang badyet sa panlipunang serbisyo habang lumalaki naman ang ilinalaan sa pagbabayad ng utang.

Ang kakapusan sa pondo ng gubyerno ay pinasasahol pa ng talamak na katiwalian at korapsyon. Taun-taon P200 bilyon (20% ng kabuuang badyet ng gobyerno) ang nawawala sa kabang-yaman ng Pilipinas dahil sa pangungurakot ng matataas na upisyal. Noong nakaraang eleksyon, ginamit ni Macapagal-Arroyo ang pondo ng Pagcor, GSIS at iba pang ahensya para sa pangangampanya.

Ang matinding paggastos noong eleksyon ay nagresulta sa patuloy na pagsirit ng presyo ng mga bilihin. Kakumbina nito ang walang patid na pagtaas ng presyo ng langis at iba pang produktong petrolyo. Sa dikta ng IMF-WB, naghain si Macapagal-Arroyo ng mga panukalang batas para sa dagdag na buwis upang solusyunan diumano ang fiscal crisis. Ang dagdag na buwis sa sigarilyo, alak, telekomunikasyon at iba pang serbisyo ay ipapasa lamang ng kapitalista sa mga konsyumer. Lalo lamang itong magpapahirap sa hikahos nang mamamayan.

S



RJC Pahayag Hinggil sa Katiwalian sa Loob ng Armed Forces of the Philippines

Ayon sa pahayag ng Romulo Jallores Command nitong Oktubre 17, "dapat nang kumilos ang mga patriyotikong upisyal at karaniwang sundalo sa hanay ng AFP upang igiit ang pagbabago sa loob ng kanilang institusyon at ipaglaban ang malaon na nilang reklamo sa mababang pasahod, kakarampot at laging naaantalang *clothing allowance*, at pagtanggali ng kanilang mga benepisyo tulad ng *rice subsidy* at *furlough pay*."

Ang matataas na upisyal sa AFP ang kumukurakot sa malaking pondo para sa pensyon, pautang, pansweldo sa mga CAFGU, at iba pang benepisyo ng mga sundalo, kabilang ang pondo sa operasyon, pondo sa pagbili ng mga lohistika at suplay ng AFP. Hindi pa nakuntento sa pagkurakot ng pondo sa *combat boots* at *helmet*, maging pondo sa pagbili ng *bond paper* at *paper clips* ay ibinubulsa na rin.

Habang nagtitiis sa kakarampot na sahod at benepisyo ang mga nakababatang upisyal, karaniwang sundalo, at mga CAFGU sa field, ang kanilang mga upisyal tulad ni Maj. Gen. Carlos Garcia, ay nagpapasasa sa karangyaan at nagmamay-ari pa ng milyong dolyar na deposito sa mga bangko sa US.

Sintomas ng nabubulok at naaagnas na sistema sa loob ng AFP ang pagsingaw ng mga kaso ng katiwalian na sangkot ang mga heneral at matataas na upisyal nito. Hindi lang si Maj. Gen. Garcia ang dapat imbestigahan kundi ang lahat ng matataas na upisyal ng AFP at Department of National Defense, kabilang ang mga dating Chief of Staff nito.

Ayon kay kasamang Jose Buenaobra, ang tagapagsalita ng RJC, hindi na kayang pagtakpan ng rehimen at mga upisyal ng AFP ang umaalingasaw na amoy ng kanilang

kabulukan at nagbubunga ito ng malawak na demoralisasyon sa hanay ng mga nakababatang upisyal at karaniwang sundalong nasa field. Hindi mapipigilan ng rehimeng Macapagal-Arroyo ang pag-aalsa ng maraming sundalo kahit magpatupad ito ng promosyon sa matataas na upisyal ng AFP dahil hindi na nila masikmura ang nagaganap na kabulukan sa loob ng institusyon ng militar.

Pinaaalalahanan ng RJC na dapat nilang suriing mabuti kung sino ang tunay nilang kalaban at sino ang kanilang tunay na pinaglilingkuran, sa halip na ituon ang kanilang mga sandata sa aping mamamayang naghahangad ng makabuluhang pagbabago sa lipunan.

Kailangan ang lubos na reoryentasyon ng AFP at ng estadong pinaglilingkuran nito. Ang tunay na hukbo ay iyong naglilingkod sa mamamayan laban sa imperyalismong US at lokal na mga utusan nitong burgesyang kumprador at panginoong maylupa.

Ang pasistang oryentasyon ng AFP, at ang talamak na korapsyon at bulok na gawi sa *chain of command* nito, ay larawan lamang ng **b u r u k r a t a** - kapitalistang oryentasyon ng estadong pinaglilingkuran nito.



Matamang sinusubaybayan ng RJC ng NPA-Bikol ang karaingan ng mga batang upisyal, karaniwang sundalo, at mga CAFGU sa ilalim ng 9th Infantry Division at palaging nakahandang makipag-ugnayan sa iba pa sa kanila tulad ng mga nauna nilang namulat na kasamahan, panapos ni Ka Jose.

S

Bibigwasan ng mga Taktikal na Opensiba ang Rehimeng US-Macapagal-Arroyo

"Nananawagan ang Panrehiyong Kumand sa Operasyon ng BHB sa lahat ng kumand at yunit ng BHB sa rehiyon at sa mamamayan na bigwasan ng malalakas na hambalos ang inutil na rehimeng US-Macapagal-Arroyo sa pamamagitan ng malalaki at maliliit na taktikal na opensibang kayang ipagwagi," ayon sa pahayag ni Kasamang Jose Buenaobra, ang taga-pagsalita ng Romulo Jallores Command ng Bikol, nitong Oktubre 29.

Sa kabila ng walang kahalintulad na pagsasamantala't pang-aapi ng rehimeng US-Macapagal-Arroyo, ang mamamayan ay wala nang ibang masulingan kundi ang rebolusyonaryong paglaban at ang paghahangad ng rebolusyonaryong pagbabago sa buong sistemang panlipunan.

Aniya, kailangang targetin ng mga yunit ng BHB ang mga sagadsaring yunit at opisyal ng AFP at CAFGU na sangkot sa mga karumal-dumal na krimen sa

mamamayan, notoryosong tagalabag ng karapatang-tao, at direktang sangkot sa malalaking kaso ng katiwalian, korapsyon, at kriminalidad. Kabilang din sa target ang mga yunit ng PNP na grabe ang katiwalian at aktibo sa kontra-insurhensyang operasyon ng gubyrno.

Hinihikayat din ng RJC ang mga karaniwang sundalo at nakababatang upisyal na naghahangad ng reporma at pagbabago sa organisasyon ng militar na makipag-ugnayan sa rebolusyonaryong kilusan para sa iba't ibang antas ng pagtutulungan sa kagyat at sa pangmatagalan.

Ang mga karaniwang sundalo ay maaaring magbuo ng mga hayag at lihim na organisasyon at isulong ang kanilang mga kahilingan. Sa maksimum, tumiwalag sila sa AFP at sumanib sa mga yunit ng BHB na tunay na naglilingkod sa mamamayang api at nagsusulong ng rebolusyonaryong pagbabago ng lipunan, ayon pa kay Ka Jose.

S

Manood, Mamulat, Makibaka

Hinahandog ng isnayp, rebolusyonaryong midya ng Bikol, ang mga pelikulang bayan...

Awit at Ngiti - ang mga tunay na pangyayari sa loob ng mahigit limang buwang pangangalaga ng NPA sa mga bihag ng digma.

Bagati: Sa Bawat Hakbang ng mga Pulang Mandirigma

Asolt: Mga Tagpo sa Taktikal na Opensiba sa Tinambac, Camarines Sur

Isnayp Balita Marso 1, 2004

Sulo kan Bikol

Mga Bidyu-Musika:

**Manggagawang Pangkultura
Martsa Kan Bikolandia**

Para makakuha ng kopya sa vcd, sumangguni sa kinauukulang yunit ng BHB sa inyong erya at sa mga kasapi ng kilusang lihim.

Hinihikayat din namin ang inyong mga puna at komentaryo para sa pagpapahusay ng ating mga pelikulang bayan.